

第二冊

江水 一 同治元年至光緒十七年

再續江水金鑑

諸青來



再

續

光

水

金

鑑

再續行水金鑑卷第十

江水編年十

清穆宗同治初遂甯縣三慶隄傾圮薄川府志

同治初水師後營統領丁義方壘石增修湖口縣長虹隄江西通志

同治初宿松縣知縣劉奎光勘明縣南文公隄原址歸德化縣修建禦湖各隄民國安徽通志水工稿引宿松縣志
無爲州知州劉燧基於青山圩建壩外護隄一道民國安徽通志水工稿引廬州府志 護隄長六百餘丈

同治元年監利縣楊林關潰潛江縣東南鄉被淹荆河東岸木頭垸石家拐隄潰黃中彭宅傍潰續修潛江縣志
廣濟縣知縣方大湜二月捐俸倡修盤塘新隄七百餘丈久漸圯塌 石隄三百二十餘丈餘皆

加高培厚併創建修防所於武穴鎮刊列條例以備歲修知縣方大湜盤塘石工記邑於大江之濱所恃保障瀕江生靈者類皆倚隄以爲固而隄之在一邑有關一邑利害者有關數邑利害者坐視其潰而不爲之所爲害者重負一邑之生靈更重負數邑之生靈顧欲爲之所而不深維可久之計其弊亦與未爲之計者等咸豐戊午春予承乏廣濟甫入境問民疾苦食曰自道光戊申已酉歲江決盤塘壩害甚酷旋應請帑興築號曰新隄而浸爲漲融恐尋復有淪胥患予聞之惻然抵官舍檢邑乘中載廣濟居楚之黃梅皖之宿松望江懷寧上游盤塘復踰廣濟江隄上其地一決五邑皆成巨浸始知是隄爲地至要旣而循視江隄水至盤塘數里遙望銀濤雪練怒號擊撞而隄亟如一綫橫繫幾欲爲長江捲之去至則浪花噴薄逼人襟裾若絙欲絕者無慮數十處詢之士人云盤塘與興國洲之黃龍洲隔江相望夏秋漲發水爲南岸洲壑直注北岸衝突隄屢爲齧且緣新築歲修時

例無夫役可徵自不得不卑薄乃爾始知是隄爲勢更至危夫以至要之地值至危之勢吏蠹土者顧不知所爲計久遠欲求數邑生靈幸免其魚之厄不可得也予爲是早夜思維計欲經久匪取材於石不可適籌得公項八百餘緡乃親履沮洳率生員蔡錦如監生游映奎郭在岐陳維敬張翼于總衙胡錫哲等賦丈屬役卽隄外最險處自趾至隄之半固以巨石崇五尺修三百二十餘丈植之欲其平壘之欲其凝鱗次之欲其無間可築外此三百餘丈命衙書掇物土方增之使高培之使厚鳩工壬戌歲二月竣事四月計費所籌資外出臺中俸銀三百餘始獲成 廣濟縣志

是年常德府知府瑞琛以坑屬南省首障周環履勘見武高龍低龍隄均濱大河險要較多諭令監生謝朝郁廩生李珍李鴻生員彭錦元鄭澤棠等添設石礮七座以殺水勢東西塘一座陳公隄一座蠟樹灣一座紅沙灣一座丁家吉一座上林寺一座窰頂上一座龍陽縣志

是年饒州府夏六月大水禾苗盡損饒州府志 餘干縣夏大水龍津圩潰壞漕倉下鄉早稻絕粒 餘干

府志 豐城縣夏大水決馬湖壩隄七十五丈底刷成潭牽灣改築三百九十二丈決觀音壩台掌街土隄牽灣修復隄旁添修石壩一座長闊各六丈高二丈陳湘渡決隄八十餘丈淤塞八十八都六圖一甲糧田二百二十一畝淤塞二甲糧田四十七畝淤塞五甲糧田并改壩脚二百零三畝王家廩鄔家廩彭家井永安壩橫壩頭蛟塘壩等處皆決羅湖石閘小港口石閘俱被沖塌縣尹畢亮勸捐先後修竣豐城縣志 清江縣五月大水茅洲隄衝決二年知縣張興言修復清江縣志

同治元二年間江蘇巡撫李鴻章駐軍上海飭挑吳淞江 詳見同治四年奏

同治二年六月壬辰(十七日)諭議政王軍機大臣等據都察院奏公安民人葉華品呈稱該縣自咸豐十

年江陵之毛家尖隄潰漫被淹四載屢經督撫飭江陵修復復由公安籌款幫費均以無費停工小民頻遭水患淹斃餒斃慘不可言懇恩早爲修復等語本目已明降諭旨令官文等查明該處修隄之費向來是否民捐民辦抑應官爲修理酌量奏辦惟覽該民人所呈該縣連年被淹流離困苦經費實無從出官文嚴樹森尤當體察情形如向係民捐而現在民力實有未逮之處亦當設法迅爲捍築保全民命毋得徒事批飭興修仍復任令地方官藉口修費延擱不辦以重隄工清穆宗聖訓 清穆宗實錄載同治二年十一月乙巳初二日諭部察院奏湖北民人黎華品以隄潰停修全境被害等詞赴該衙門呈訴據稱公安縣歷年被淹皆因江陵縣南岸之毛家尖楊家尖等處隄潰所致公安民人撥助經費始行興工幫費用盡工即停止本年復被江水漲淹等語隄工緊要民命攸關亟應設法修築以資捍衛

是月二十八日江西巡撫沈葆楨奏爲特參辦理疊次挖隄重案姑息貽患之守令應請旨交部議處事竊同治元年江省頻遭水患據臨江南昌等郡災民控稱緣清江新淦上鄉匪徒疊次挖毀晏公隄是以清江縣下鄉與豐城南昌等縣大受其害臣當批飭嚴拿懲辦未據詳覆查清江縣小河界連新淦發源於上數十里之閣阜山山水從永泰與龍居寺分流而下匯狗頸橋以歸大河傍小河有老隄曰晏公隄以防山水橫決隄之東爲清江下鄉迤東爲豐城迤東北爲南昌地勢漸趨漸下數十萬戶田廬皆恃此隄以爲保障自咸豐四年上鄉刁棍傳存性思擅一鄉之利藉詞大河倒灌賄買下鄉劣棍范元竣私立合約將晏公隄開一閘口於狗頸橋斷流橫築一隄意謂河水倒灌以狗頸隄禦之山水漲發以晏公閘洩之上鄉可永無水患而此外之受害與否非所計也上年四月間霖雨不止狗頸

隄既不足以禦大河漫隄倒灌而入山水暴發亦非晏公閘一口所能旁洩上鄉仍復被水遂集匪徒將晏公隄挖毀數十丈河流山水交注而下勢若建瓴數百里田廬竟成巨浸水退後經府縣勸令下鄉民戶自行修復飭上鄉紳士交出匪犯而上鄉迄未遵照七月間大水復至又將新復之隄挖毀致令上控旋經查隄紳士甘肅臬司劉于濬繪具圖說請勒提主謀之生員傅景藻教職楊懋忠並已獲要犯楊萬和傅映松先行解省懲辦臣以淫潦爲災沿河田畝受倒灌之害勢所難免然事由天定非人力所能施且較之建瓴下注者輕重迥別若曲防湮水以鄰爲壑擁一鄉之利貽數邑之害豈可姑容嚴飭臨江府單興詩卽日勒令將狗頸橋橫隄全行平毀晏公隄堅築毋庸設閘以復舊制至上鄉居民如能各修各隄亦可自免水患何必損人利己並勒提各要犯解訊去後乃該守一味姑息日事因循而匪徒遂謂官畏民悍本年三月間陰雨連朝山水河水同時並漲復鳴鑼聚衆將晏公隄挖毀禁之不止請兵拿辦前來臣照會護南贛鎮普承忠帶兵五百名劄劉于濬酌帶礮船前往會辦旋據督飭接署清江縣事陳紀麟拿獲匪犯傅啟幅劉珍圃楊德修傅昭榮管占元新淦縣程乃文傳到生員段克拔劉曉堂張高載拿獲民人李盛照楊拔羣訊據供稱疊次聚衆挖隄爲首者實係楊萬和傅映松傅啟幅楊德修傅昭榮五人並以放水爲功按田派費肥己而傅景藻楊懋忠爲之主謀本年三月首先鳴鑼聚衆則段幅堂爲首其段克拔劉曉堂張高載劉珍圃管占元李盛照楊拔羣供只隨衆議事並未在場挖毀段幅堂尙未到案傳景藻楊懋忠於獲案後三月十六日聞上鄉復有挖隄之信懇請自往查阻前代理縣張興言信以爲實致令乘閒脫逃該護鎮普承忠與該司劉于濬會稟以狗

顯隄雖經督飭清淤上鄉團紳平毀晏公隄亦經下鄉首士鳩工修復惟該犯等目無法紀怙惡不悛非將爲首之楊萬和傅映松傅敏幅楊德修傅昭榮就地正法示懲則兵退必復萌故智經臣批飭照辦並將段克拔劉曉堂張高載褫革衣頂與管占元劉珍圃李盛照楊拔羣暫行監禁俟拿獲傅景藻等再行實辦臣查楊萬和等叠次挖隄害貽數邑實屬罪無可逭該臨江府單興詩若於初次滋事之時加以重懲何至釀此巨案前代理清江縣事張興言於此等要犯聽其詭詞兔脫均屬姑息貽患茲據藩臬兩司轉據該道揭參會詳請奏前來相應請旨將臨江府撤任知府單興詩前代理清江縣事撤任知縣張興言一併交部議處以儆馭惕而肅吏治除再飭司通飭各屬一體協緝傅景藻楊懋忠段幅堂務獲究辦外謹會同協辦大學士兩江督臣曾國藩恭摺具陳

沈文肅公政書

是年□月湖廣總督官文湖北巡撫嚴樹森飭道府會勘萬城隄札照得本部堂院訪聞萬城全隄自咸豐年間軍務倥偬又頻年水勢平順未能專力歲修民捐土費亦不肯踴躍完納道光二十四年潰口之後安瀾已二十年日久懈生不免視爲恆泛若不嚴立章程亟加整頓誠恐日後修築草率一遇盛漲設有疏虞所關非細查該隄原係荊州府專責荆宜施道亦有兼管責成向例要工每年秋後由府勘估興修本部堂院現擬定章每年霜清水落後該道府會同親身赴隄按工程之夷險核實估計歲修土費應實用若干照派徵收然後由府派人分段興築工竣之後該道親往勘驗如有與原估工程不符或偷減草率即飭該府再行加修如式如違參揭不准稍徇情面果能一律堅實如式由該道府層遞出結呈齊備案此次奉文之後先將隄身原來高厚寬窄一面切實開摺稟明存案一面刊

碑註明以後再將本年經修姓名用過土方工費數目所修工程高厚共加過土方若干尺寸分段立碑詳細刊載明晰並通報查考如修不堅實以及剝土見新各弊一經委員查出即著落該道府分成賠修如此則小民見土費實歸工用亦必踴躍輸將而隄身益加厚永無水患矣 又曾委派員視工札 照得荊郡萬城大隄爲下游田廬保障百億萬性命所託關係甚重而通隄險工又以郝穴爲最要龍二淵次之本年夏間據荊州府周守稟報龍二淵四號上段石岸崩蹙數丈下節接連二段正當迴流頂衝旋成月形時有坍塌老廟臺鎮安寺各隄亦多崩坍危險更甚而老廟臺江底極深現以繩繫石下探至五丈有餘尙無阻隔可見尙未到底其崩寬五六丈者隄面亦僅存五六丈外止撐幫二道再外則龍二淵矣由來深潭無能退挽更無計施工加之郝穴地本多沙無從取土情形如此直不知如何設法等情當經批令不惜重費設法搶築仍俟水落歸槽後相度形勢妥籌修復在案茲幸安瀾告慶水將歸槽應即乘時派委大員勘估籌修以禦來年汛漲而保無窮賦命合行札委札到該道府立即遵照剋日馳赴荊州會同該道府督同該府親赴萬城大隄先行巡視一週確勘郝穴及龍二淵工段何處崩蹙寬長各若干丈尺或應撐幫或應退挽應於何處取土此外各隄段如何情形如何加高培厚先行繪圖貼說資核一面確加估計實需工價若干按照向章由該府派費興修如費一時未齊該府應如何籌集一切切實情形通稟核辦此係最要之工刻不容緩務趕春前一律趕築堅固該道府會督該道府實心實力妥爲勘辦毋任官紳畏難苟安致貽明年大患是爲至要 按此兩院會委大員之案前經非有要工不另委道府前以軍務倥傯經費支絀累年失修以致叠出險工是年將軍修築亦如大災之後必遣派賢

員督辦重飲工也委員候補道周溥並識之 荊州萬城隍志

是年灌縣水溢堰壞成縣道何咸宜奉檄督修越明年甲子爲木商所愚誤鑿雞台山趾卽三道崖而堰遂不可救治蓋江水急流必須緩受自虎頭崖下山足一堵水勢趨南岸魚嘴抵之向北水勢遂趨雞雞台台下山足如雞距激盪奔湍使之南去南隄魚嘴曲折緩受復使之北又有人字隄濠澗其勢使正流直注象腹灌入寶瓶口象腹之北復以象鼻瀦水徐徐吐出不使衝擊爲患然後折而東薄城以下是堰之增減賴離堆山口以檢制之障峙賴三道崖以支護之崖脚存則離堆可久崖脚去則離堆可危此所謂堰右檢左者固李冰因地制宜之妙用一張一弛有如輔車相依流俗惡得而知之乃以木筏西來轉柁稍遲觸石輒不救諸賈乞從吏白何謂鑿之可已患斧斤方運而何遽不起自是毀金隄潰古堰漂沒田廬頻歲爲災而木筏之壞亦愈多非獨灌人首受其禍且波及用水州縣官民交困矣灌縣志

是年襄陽縣知縣方大湜重濬襄水故道

桐華閣文集方大湜重濬襄水故道記云襄郡以水得名水經注謂水出柳

子山下東爲鴈湖自湖而兩分北爲搜谿水東南爲襄水而樂史則謂水駕山而上者皆呼爲襄往者潯水本東合襄水自老龍隄建潯水不得繞城以合於襄城以無害而襄流亦微然縣西南境重崖疊阜當夏秋雨集山水建瓴下所謂九冲十八窪者其水又皆隨於襄合助其虐於是宋郭果擬建救生隄以防襄且設二關形襄水之所經曰南溝曰北溝曰支溝支溝居北溝上流而南溝爲大土人又稱大溝然自宋迄今歷數百年隄闢無存故道之湮塞久矣同治二年春余以廣濟令來樞襄邑地當孔道軍符絡繹疲於應接適鰲大起日舉行田野中督民捕捉見襄水故道湮深載一尺二尺闊亦僅及二三尺或五六尺心固已疑此區區者

窳於受也及捕蝗告盡大雨時行襄水果橫衝四突民地之以畝計者沒且萬餘余乃案行各溝指溝橋之名延生者示襄人曰汝不知昔曰之溝盡視橋橋洞故當在水中其闊且三丈則溝可知矣今溝闊不及十之一二何哉夫水廣而溝狹即捐緣溝地以廣溝義亦應爾矧歸溝侵地而何新乎且侵溝地以爲利水則漫溢爾侵地而又加廣爾果何利焉則皆應曰唯唯請一如溝舊惟宜是聽於是按畝均力而董以紳耆總成分任各懷所司潯南溝三千三百餘丈水由九宮山前的盧橋延生橋通潯橋過小山頭至觀音閣山麓以入於潯潯北溝三百餘丈水自九宮山別趨分水口經何家橋潯水洞灌入城潯潯北溝上流之支溝一長四百餘丈水由萬山至高家莊坊一長七百餘丈水由麒麟店至琵琶山皆旁入南潯南北溝之深皆十尺支溝中之南潯上廣倍十而益四下廣倍十而損二北溝之廣視其深而益五支溝之廣視其深而益三郭某遺跡不可復考乃以已意度地勢而開之的盧橋曰南開何家橋曰北開南北開更代啓閉水涸則北蓄於潯潯則南洩諸溝不以絲毫耗民而數百年之害盡亦襄人急公好義之效也 鍾祥縣襄隄六工劉家灣隄險幾潰知安陸府劉榮籌費急修內月暫資保護至閏八月水落隄仍潰新穀已登歲以不害四邑公同挽修內月一道三年工竣計用錢二萬餘緡鍾祥縣志 潯江縣襄河北岸太平垸高家拐荆河西岸永豐垸熊家垸通順河東岸義豐垸義河口俱潰續修潯江縣志 漢陽縣重修德豐垸隄 漢陽府知府鍾謙鈞築堡於袁公隄外護之六年復於舊址加高培寬並建上中下三閘以資蓄洩是年水至約禦水三尺居民賴之堡外卽土人所謂黃花地袁公隄在漢鎮後鎮爲水陸交衝江漢湖三水環繞夏秋之間常成巨浸明崇禎八年通判袁焜鼎築袁公隄在漢鎮後鎮爲水陸交衝江漢湖三水環繞夏秋之間常成巨浸明崇禎八年通判袁焜鼎 續輯漢陽縣志

是年湘陰縣水湘陰縣圖志

是年豐城縣春水決羅湖石開牽場大橋墻官紳妥議按田派費修復左家渡添修石脚四十丈陳相渡決隄百餘丈是隄常瑞河之衝關係新豐兩邑生命自咸豐八年屢修屢決張尹師亮移會新建新尹鄭會勘妥議派修豐城縣志 新建縣四月大雷雨山漲暴發平地水深丈餘西山出蛟九十餘處衝倒橋梁無數山下居民多溺死 新建縣志 新淦縣鳳山隄復圯歛畝費復修新淦縣志 清江縣猪婆渚隄培修堅固 清江縣志

是年江蘇巡撫李鴻章檄候補府汪有助督濬吳淞江以便軍運並將上海五逆灣開通取直長一百八十餘丈民國私纂江蘇通志水工志稿引松江府續志

同治三年八月十六日兩江總督曾國藩奏爲遵繪安徽全省地圖并長江圖說恭摺進呈事竊臣於同治二年十二月三十日接准總理各國事務衙門咨稱該衙門具奏飭令各省繪具地圖一摺奉旨依議欽此行知到臣伏查兩江統轄三省幅員遼闊當經臣咨明江蘇地圖由李鴻章繪呈江西地圖由沈葆楨繪呈其安徽地圖爲臣現在駐紮之所應由臣處繪呈至長江數千里近年中外交爭關係最重有應另繪一圖均由臣衙門辦理旋經札派分發補用知府劉翰清選用縣丞方駿謨綜理其事該二員淹雅詳慎會同各屬地方官詳查將山川險阨村鎮關津水旱驛站計里詳繪遵照總理衙門所開二寸方格每格當五十里推測星度按方繪填計總繪安徽省圖一幅分繪府圖八幅直隸州圖五幅至各州縣零星村集自軍興以後多經焚燬詢訪甚難若憑志乘舊圖又恐歧誤失實因仿照康熙圖之例但將村鎮併入府圖不復另繪縣圖以昭核實其長江一圖從湖南巴陵縣洞庭湖口起至江

蘇崇明縣海口止凡夫江面曲折道里袤斜磯港暗沙夷館關卡均經實測詳查逐一登載至輪船行江最畏閘淺其於江底深淺尺寸講求甚精現亦略仿其意另行貼說以便稽考謹將安徽各圖長江圖裝成全冊專弁費遞恭呈御覽

曾文正公全集

是年四川總督駱秉章奏夏雨時行河水過大堰隄衝刷歲修不敷酌派新繁縣堰工銀一千一百兩知縣程祥棟請照舊例仍將積貯義田濟穀如數提賣申解同治四年纂修都江堰志應派銀二百二十七兩知縣張文珍仍照舊例提賣義倉存貯濟穀並繪堰圖申解至平閘口分派大河隄埂一百六十餘丈係崇甯縣傍河糧民修築其河口係郫縣新繁糧民自行洶濬

新繁縣志

是年鍾祥縣襄隄六工邊家拐新挽內月隄之下隄險幾潰知安陸府覺羅同動知縣許光曙詳請批飭四邑公同協修退挽內月隄一道至四年夏工竣通計用錢三萬餘緡

鍾祥縣志

漢陽縣郭公隄在城西北大別山麓月湖中北抵漢口五顯廟南岸長二百四十五丈高三丈闊一丈八尺同治三年郡守鍾謙鈞重修

漢陽縣志

江夏縣城外濱江攔江隄塍一道自咸豐壬子兵燹以後大王廟起楊

四磯上關帝廟止中有倒口缺口二十六處並殘缺各工於同治三年在於竹木商捐款內動支錢一千一百五十餘串委員勘估督修完竣

江夏縣志

是年餘干縣大水圩圯緩徵餘干縣志樂平縣五月大水東鄉烏潭渡五洞大石橋盡圯

饒州府志

豐

城縣水決漕倉背隄得修三十六丈南沙岸添建石埭一座改建石隄三十丈決長安壩黃賢埠等隄小港口開脚場卸牽決土隄張尹師亮倡捐修砌

豐城縣志

新淦縣七月石口隄被水坍塌經知縣程

乃文飭令五都十一二三圖按糧並輸捐錢七百二十餘千文至是年十二月工竣新淦縣志

同治四年正月二十一日李鴻章奏爲蘇省挑清吳淞江河道在事出力員董懇恩獎敘事竊照吳淞江居太湖下游爲蘇省三江之一西受蘇郡東匯黃浦江以達於海蘇松太三府州屬田疇灌溉宣洩所資商民舟楫往來所必經也同治元二年間臣駐軍上海查該處河道年久未濬海潮灌塞日以淤淺旱則蓄水無多潦則泛溢不定於農田水利關係尤重當經臣飭令署臬司劉卨督同候補知府汪有助署上海縣知縣王宗濂暨委員紳董等籌款挑濬計自上海曹家渡野雞墩至黃渡爲吳淞江正河又申紀港江橋南翔各支河並壩外婁浦口撈清稀淤五逆濶取直開挖新河總共工長九千二百餘丈逐段挑濬核給付工錢十四萬五千餘串臣親往驗收工程均尙核實河身一律深通查開濬之時正值連月霖雨集夫鳩工艱苦百倍該員董等一面催捐籌費一面分款督率得以剋期蒞事其裨益於農田商旅者甚多所有出力各員董自應擇尤給獎據蘇藩司劉卨膏臬司郭柏蔭查明具詳請奏前來臣覆核無異謹將尤爲出力各員董注明勞績酌擬升階開繕清單恭呈御覽合無仰懇天恩俯准給獎李文忠公全書 上海縣志載同治元年署巡撫李鴻章檄署按察使劉卨膏滄吳淞江曹家渡至野雞墩淤淺時以

嘉定克復計由江進軍凡開濬三千一百餘丈又開婁浦口一百三十餘丈初議上海通縣按田二十五畝出夫一名每土一方給錢三百丈嗣因逃亡未復應募寥寥仍分偏華青嘉寶民夫正月興工至秋方畢其費出自借墊後自捐捐項下歸補縣志又載同治二年十月署布政使劉卨膏委候補府汪有助署知縣王宗濂勘估吳淞江將五逆濶自該家渡起至長生庵東南出口止就民田開通取直計長一百八十七丈三尺挑土二萬九百餘方凡傳逆濶兩頭通江者皆屬斷焉案道光七年陶文毅公開濬吳淞江

始議遂灣取直將六逆灣填斷改道民田至是復截去五逆灣江流迅駛舟人便之當事者咸以灣逆沙停通河爲梗不若一瀉二十里力足以刷渾潮第自夏忠靖開江貨浦所以留此兩灣者非以上流之勢如高屋建瓴無紆迴以停蓄之恐新開以東更無靠受地故耶今上流微而下流噎徒以阻塞歸告於灣儒將來上流復盛灣無可蓄勢必崩決莫若就近釀爲支渠稍殺其怒時劉復徵令撤去開座集董議覆恐害兩岸民居力請免乃已

十二月署湖北襄陽府事方大湜重濬襄水故道後記 余既濬襄水之故道明年得代去其年復來權襄陽府事傍溝地大穫民咸稱利逾歲爲同治四年河水大漲倒漚入南溝溝所受山水爲客水遏抑益湍怒砰訇抨擊摧立土而積之兩岸遂有坍塌者前慮之未周成功之莫保余滋惡焉乃復集襄人而命之事授之則予數就工所而屢省之岸峭易崩也使厚下而稠上中狹寡容也使增其上廣爲四十有一尺水卽漲游波得寬緩而不迫其他則皆仍前蓋是渠之成前後役夫十萬有餘而民無憾言道光中郡守周君凱邑令熊君寶書固嘗從事茲溝而爲利不久彼豈皆知慮不逮哉溝工既竣因及橋梁多其門而崇其庳使水無或有所迫阨而不得達若通濟若麟兒若衆善若檀溪寺山脚若三官殿廟後蓋凡五所又念司歲修者不能無往來飲食之費因置本百五十緡而二其息歲屆九月朔日諸在事集羊杜祠則取資焉分所濬地爲五段段各有長買地廿餘畝隸各段而食所入是皆前所未及爲者是役也始事十月九日凡歷五旬而畢襄人士均有賢勞而張生德淑虧已資以歲事尤應

書法云桐華閣文集

是年巡視長江水師侍郎彭玉麟築湖口縣塘隄長八十丈高七丈至五丈不等塘隄在湖口澄清門外

江西通志

是年鍾祥縣襄隄四工八工九工十一工隄險知安陸府覺羅同勳知縣孫福海督同首士勘估詳請批飭四邑公同修理第四工石礮一道第八工第九工間石礮一道十一工拋碎石坦坡以資防禦通計用錢二萬餘緡鍾祥縣志

潛江縣荆河西岸水豐琬沙月隄潰續修潛江縣志

天門縣夏六月江水

溢白沙潭決漢川縣西北四鄉水漢川縣志

是年湘陰縣水湘陰縣圖志

是年饒州府十一月湖水暴漲尺餘忽溢忽消如是者三次饒州府志

餘干縣大水圩圯緩徵餘干縣志

豐城縣水決官湖墻一百七十六丈灣修一百九十丈仙壇腦決一百二十五丈灣修一百四十五丈五尺合掌街決一百一十五丈灣修一百二十丈瑤壇墻決三百三十八丈灣修三百四十五丈嚴

家灣決一百零四丈灣修一百一十丈彭家湖決一百四十二丈灣修一百六十丈車巷口決七十丈

灣修八十一丈傅家坊決一十三丈照舊修復龍舟墻決二百五十丈灣修二百八十四丈大港口決

四十丈灣修五十八丈淤塞糧田三百八十餘畝張尹師亮動用里夫銀興修五年陳尹汝霖修竣豐

城縣志

是年無爲州知州穆其琛加幫新河上岸隄長三百四十丈民國安徽通志水工稿引廬州府志

是年曾國藩督兵勇疏濬城內秦淮河丹徒縣議修復漕河口沿江埭埂常熟縣濬三丈浦昭文

縣濬許浦塘民國私纂江蘇通志水工志稿引各縣志

同治五年五月甲申（二十六日）以湖北天門京山兩縣隄工完竣復已革知府徐暢達職並賞還花翎餘

加銜升叙有差清稷宗實錄

十一月江南道監察御史王書瑞奏再伏讀乾隆二十七年浙江撫臣莊有恭因湖河水漲日久不消親赴嘉湖一帶察看知由水歸太湖之路不暢並疑下游歸海之路亦有壅淤曾遣員前往江蘇查勘以事在隔省難得確切請將浙省通湖漫港先爲開濬專摺具奏嗣莊有恭調任蘇撫經浙撫仍用前議將湖州府屬之七十三漫港酌用民力先後疏濬奏奉允行並於摺內聲明江蘇之寶帶橋係太湖出水之口應否疏濬咨行莊有恭查辦嗣經莊有恭奏稱太湖出水之口不特寶帶橋一處東南財賦重地水利民生大計應於運河以西但就有港可通有橋可洩之處爲之清釐佔塞規仿舊額務使分流以迅速無阻其運河東三江故道吳淞江自甌山湖以下婁江自婁門以下疏濬寬深得資宣洩則東南億兆咸沐皇仁等語蓋就浙江而論則浙西之水杭嘉湖三府形勢各有要隘脈絡實相貫通杭則上流也嘉則杭之分流也至於湖則引天目諸山之水獨匯於太湖譬則釜底也故言浙西水利者莫要於湖之漫港若合江浙而論則蘇松諸郡與杭嘉湖異派同歸蓋水之來源自杭之天目山而下勢若建瓴分注嘉湖在浙省不患其源之不通而專患其流之不洩由浙西湖屬諸漫港入太湖由太湖而東入江蘇境吳淞江婁江黃浦白茆各口在蘇省固患其源之不通亦患其流之不洩湖州處太湖上流之最要蘇松等郡處太湖下游之最要使蘇松下游疏通而湖州上流阻塞則害在湖州使湖州上流疏通而蘇松下流淤塞則害在蘇松並害及杭嘉湖故言東南水利者以蘇松杭嘉湖各府缺

一不可是以莊有恭在浙撫任則並計及於江蘇在蘇撫任則仍計及於浙江也蘇松杭嘉湖係東南財賦之區當此兵燹之後興利除弊勢不可緩請應一併飭下江蘇撫臣查明有無淤塞應行開濬之處妥議具奏庶東南民生感戴仁恩而於錢糧正供亦無歉缺矣 上諭御史王書瑞奏浙省漫港淤塞亟宜開濬一摺據稱浙江水利在浙東則有海塘在浙西則海塘而外又有漫港湖州府屬烏程縣境有三十九港長興縣境有三十四港康熙雍正乾隆年間疊經疏濬自逆匪竄擾後泥沙堆積漫口淤阻聖種多致淹沒請設法開濬等語著馬新貽卽行派員履勘工程緩急設法籌款次第趕緊興修不得意存畏難稍涉遷就另片奏江蘇蘇松諸郡與杭嘉湖異派同歸湖州處上流之最要蘇松等郡處下游之最要下游疏通而上流阻塞則害在湖州上流疏通而下游淤滯則害在蘇松並害在杭嘉湖請飭江蘇一併查明開濬等語並著會國藩李鴻章郭柏蔭派員履勘明確與馬新貽會籌妥辦通力合作該數郡爲東南財賦之區務須實心經理期於國計民生皆有裨益續纂江蘇水利全案 長興縣志載董儒翰阻濬漕港記漢在同治乙丑之冬余僑寓郡城之宋家莊城中設有善後總局各屬亦俱設局辦理諸善舉中丞馬穀山給余照會囑在地局辦事時郡守爲楊公榮緒總辦局務每與講及善後之要莫先於興水利楊公深然之顧因經費難籌未敢造次從事越明年秋中丞來湖余偕同局諸君謁見於南門外舟次備詢地方要害同人均有疏濬水道之議次晨中丞約同至大錢口相與觀乎太湖形勢并附近各濬之待濬者時因湖之下游淤阻湖漕方倒灌余因爲中丞指陳水勢壅塞之害太守楊公亦力陳湖屬各邊港之亟宜開濬中丞同省聞於朝帝嘉納焉有旨著江浙兩省督撫勘驗興辦而余業師王又沂侍御並有封事奏開因之江浙大吏俱垂鑒於籌興水利矣夫東南財賦甲天下而藪在太湖太湖全境從西南環繞至東南大抵浙之杭嘉湖江南之